

Na osnovu člana 74. Zakona o cestovnom prijevozu Federacije Bosne i Hercegovine ("Službene novine Federacije BiH", broj 28/06), federalni ministar prometa i komunikacija donosi

**PRAVILNIK
O NAKNADAMA ZA TEHNIČKI PREGLED VOZILA I DRUGIM POSLOVIMA KOJI SE
OBAVLJAJU U STANICAMA ZA TEHNIČKI PREGLED**

(Službene novine FBiH, broj 51/06)

Član 1.

Ovim Pravilnikom određuje se način utvrđivanja i raspodjele naknada u vezi obavljanja poslova tehničkih pregleda vozila, te poslova koji su s tim neposredno povezani (u daljnjem tekstu: jedinstveni sistem tehničkih pregleda).

Član 2.

Stanica za tehnički pregled vozila (u daljnjem tekstu: stanica) i stručna institucija iz člana 76. stav 1. Zakona o cestovnom prijevozu Federacije Bosne i Hercegovine (u daljnjem tekstu: Stručna institucija) dužni su zajednički, u skladu sa pozitivnim zakonskim propisima kojima je regulisana ova oblast, provoditi sve potrebne mjere i aktivnosti za ostvarivanje skladnog i stručnog rada stanica u Federaciji Bosne i Hercegovine, u cilju kvalitetnog izvršavanja poslova iz svoje nadležnosti.

Provodeći odredbu stava 1. ovog člana stanice i Stručna institucija dužni su osigurati da se poslovi tehničkih pregleda organizuju kao jedinstveni sistem i to na način koji će doprinijeti unapređenju sigurnosti prometa na cestama, te efikasnom i profesionalnom zadovoljavanju potreba vlasnika vozila.

Član 3.

Poslovi jedinstvenog sistema tehničkih pregleda, u skladu sa odredbama čl. 72., 75. i člana 76. stav 3. Zakona o cestovnom prijevozu Federacije Bosne i Hercegovine (u daljnjem tekstu: Zakon) obuhvataju poslove koje obavljaju stanice i Stručna institucija.

Član 4.

Poslovi jedinstvenog sistema tehničkih pregleda vozila koje obavljaju stanice su:

1. tehnički pregledi za utvrđivanje tehničko-eksploatacionih uslova za vozila (član 5. Zakona),
2. redovni tehnički pregledi vozila (član 217. Zakona o osnovama sigurnosti prometa na cestama Bosne i Hercegovine),
3. preventivni periodični tehnički pregledi (član 8. Zakona),
4. vanredni tehnički pregledi vozila (član 217. Zakona o osnovama sigurnosti prometa na cestama Bosne i Hercegovine i člana 88. Zakona),
5. ostali poslovi koji su povezani sa poslovima navedenim u tačkama 1. do 4., a obavljaju se u stanicama.

Član 5.

Naknada za obavljene tehnički pregled, koju plaća vlasnik vozila, utvrđuje se u jedinstvenom iznosu za Federaciju Bosne i Hercegovine, a sastoji se od:

- dijela naknade za obavljanje poslova jedinstvenog sistema tehničkih pregleda koji pripada stanicama koje obavljaju taj posao i služi za pokrivanje troškova poslovanja stanica;
- dijela naknade za obavljanje poslova jedinstvenog sistema tehničkih pregleda koji pripada Stručnoj instituciji, Federalnom ministarstvu prometa i komunikacija (u daljnjem tekstu: Ministarstvo) i Kantonalnom ministarstvu nadležnom za poslove cestovnog prometa (u daljnjem tekstu: Kantonalno ministarstvo), kako je to određeno članom 7. ovog Pravilnika.

Član 6.

Naknada iz člana 5. ovog Pravilnika utvrđuje se zavisno o složenosti i trajanju rada u pojedinom dijelu poslova jedinstvenog sistema, a u skladu s propisima koji se odnose na obavljanje pojedinih vrsta tehničkih pregleda vozila.

Visinu naknade iz člana 5. ovog Pravilnika u zavisnosti od vrste pregleda utvrđuje Ministarstvo Cjenovnikom usluga pojedinih vrsta tehničkih pregleda vozila u skladu sa članom 75. stav 3. Zakona.

Član 7.

Naknada iz člana 6. stav 2. raspoređuje se tako da:

- 90% pripada stanici tehničkog pregleda,
- 8% pripada Stručnoj instituciji,
- 1% pripada Ministarstvu i
- 1% pripada Kantonalnom ministarstvu.
- Naknada koja se uplaćuje za Ministarstvo, smatra se vlastitim prihodom Ministarstva čija se namjena određuje kao rashodna pozicija za unapređenje djelatnosti rada stanica i uplaćuje se na račun Budžeta Federacije BiH, otvoren kod UPI banke d.d. Sarajevo, broj 154 001 1100661492 uz obavezno navođenje vrste prihoda 722631 i budžetske organizacije 1801001.

Naknada koja pripada Kantonalnom ministarstvu uplaćuje se na račun budžeta kantona u kojem se stanica nalazi.

Naknada koja pripada Stručnoj instituciji uplaćuje se na poseban račun Stručne institucije.

Stručna institucija će sredstva iz stava 1. alineja 2. ovog člana koristiti isključivo za obavljanje poslova iz člana 76. stav 3. Zakona.

Ministarstvo i kantonalna ministarstva će sredstva dobivena na osnovu odredbi iz stava 1. alineja 3. i 4. ovog člana trošiti za preventivno djelovanje s ciljem realizovanja programa unapređenja vršenja kontrole tehničke ispravnosti vozila na stanicama.

Naknadu iz stava 1. alineje 2., 3. i 4. ovog Pravilnika koja pripada Stručnoj instituciji, Ministarstvu i kantonalnim ministarstvima uplaćuju stanice.

Procentualne vrijednosti dijelova naknade iz stava 1. ovog člana mogu se mijenjati samo izmjenama i dopunama ovog Pravilnika na način i postupak istovjetan njegovom donošenju.

Za pravilnost uplate odgovornost snosi stanica.

Stanica koja ne izvrši redovnu uplatu naknada u skladu sa odredbama stava 1. ovog člana, gubi pravo obavljanja tehničkog pregleda vozila do izmirenja zaostalih obaveza.

Član 8.

O doznačenom dijelu naknade iz člana 7. ovog Pravilnika stanice vode posebnu evidenciju.

Primjerke uplatnica kao dokaz o izvršenoj uplati dijela naknade iz člana 7. ovog Pravilnika, stanica jednom mjesečno dostavlja Stručnoj instituciji, Ministarstvu i Kantonalnom ministarstvu.

Član 9.

Nadzor nad provođenjem ovog Pravilnika provodi Ministarstvo.

Svaka stanica dužna je omogućiti ovlaštenoj osobi Ministarstva uvid u dokumentaciju iz koje se vidi pravilnost provođenja obaveze stanice po osnovu ovog Pravilnika.

Član 10.

Danom stupanja na snagu ovog Pravilnika prestaje primjena Pravilnika o naknadama za tehnički pregled vozila i drugim poslovima koji se obavljaju u stanicama za tehnički pregled ("Službene novine Federacije BiH", br. 49/02 i 16/04).

Član 11.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Broj 01/4-27-857-7/06
25. augusta 2006. godine
Mostar

Ministar
mr. **Nedžad Branković**, s. r.